

Karnaval Anto Kambia!

Falta algun ora so pa karnaval 2004 ta tras di lomba. Mañan hopi hende lo inisiá kuaresma na misa tumando shinishi. Despues di simannan largu di djòdjòmentu, paranda, satesfasiendo deseonan baho, kometiendo tur klase di piká, awor ta tempu pa kita e máskara di plaser i pone kara di un hende ku ta sinseramente religioso...ta tempu pa kambia!

Ma Dios no ta deseá kambio so; **E ta eksigí repentimentu!** E ta laga sa ku ningun hende ta yega shelu sin repentí! Apòstel Pedro a bisa un multitut ku nan tin ku *“repentí anto, i kombertí, pa boso pikánan wòrdu kitá...”* i Hesus a deklará, *“...si boso no repentí, boso tur lo peresé...”* (Echunan 3:19; Lukas 13:3,5).

“Repentí” ta un palabra malkomprenyé. Tin hende ta igualá repentimentu ku penetensia. Nan ta maltratá nan kurpa, pensando ku di e forma ei nan por paga pa nan pikánan. Ma bo por hasi penetensia i nunca repentí.

Otronan ke sa ku repentimentu ta tristesa i lágrimanan. Ma hopi hende a sinti duele pa e **konsekuensianan** di nan piká sin nunca repentí. Por duel nan ku nan palabranan a kibra un amistad, òf ku droga a destruí nan famianan, èts. Hudas a sinti duele ku el a traishoná Hesus, ma e no a repentí!

Repentimentu tampoko ta solamente konfeshon. Tantu hende a yega di atmití nan piká, ma nunca a repentí. Hudas tambe a konfesá, ma no a repentí (Mateo 27:3-5).

I algun ke sa ku religiosidat ta repentimentu...si bo kumpli ku e rekisitonan di bo religion (batisá, bai misa, risibí, tuma shinishi, èts.), bo pikánan ta pordoná. Beibel ta mostra ku esei tambe ta un pensamentu kiboká. E palabranan mas skèrpi di tantu Juan Boutista komo Hesus tabata dirigí kontra hende religioso. Juan Boutista a yama e fariseonan i saduseonan *“generashon di vibora”* i a reta nan pa *“duna fruta ku ta kuadra ku repentimentu”* (Mateo 3:7-8).

Kiko anto ta repenimentu genuino?

Pa di promé, **repentimentu genuino ta un kambio radikal.** Bo tin ku bira lomba 180° pa piká; e no ta un kambio gradual. Un ladron ku ta disidí di hòrta MÈNOS no a repentí. E tin ku stòp TUR hòrtamentu i kuminsá hasi trabou onrado.

Repentimentu genuino ta un kambio onesto. Bo no por skonde bo piká si bo ke pa Dios pordonábo. *“Esun ku skonde su pikánan lo no prosperá, ma esun ku konfesá i laga nan lo haña misericòrdia”* (Proberbionan 28:13).

Repentimentu genuino ta un kambio umilde. Si bo ta muchu orguyoso pa umiyá bo mes dilanti Dios i otro hende, bo no por haña Dios Su pordon. *“Dios ta resisí e orguyosonan, ma ta duna grasía na e umildenan. Umiyá boso mes anto bou di e man poderoso di Dios, pa E por halsa boso...”* (1 Pedro 5:5-6).

Repentimentu genuino ta un kambio ku ta korigí e pasado. Si bo ta repentí di bèrdat, bo ta despuesto pa rektifiká e daño ku bo a kousa den pasado. Talbes bo mester bai serka un persona ku bo a ofendé, atimití bo piká, i pidié pa pordonábo. Kisas bo mester pag’é pa daño material òf algu ku bo a hòrta.

Repentimentu genuino ta un kambio preventivo...bo ta tuma medida pa prevení ku bo ta bolbe hasi e mesun piká den futuro. Despues di karnaval, tantu hende ta duna impreshon ku nan ta repentí di nan pikánan. Ma nan tin intenshon ta pa gosa e mesun pikánan otro aña! Esei NO ta repentimentu! Hipokresia por gaña hende, ma e no por gaña Dios!

Falta algun ora pa kambia...pa repentí. Ki sorto di kambio esei lo ta? Repentí sinseramente di bo piká, i konfia Hesu-Kristo so pa salbashon. E SO por transformá bidanan i produsí bèrdaero kambio!